

張文襄公奏議

張文襄公全集卷三十一

奏議三十一

拏獲會匪訊明懲辦摺

光緒十七年十二月初七日

竊臣等前經承准軍機大臣字寄光緒十七年六月初六日奉上諭各省哥老會匪最爲地方之害疊經降旨查拏並經各該督撫先後獲案奏明懲辦惟此等匪徒行蹤詭秘與游勇地痞暗相勾結動輒糾黨煽亂甚至造謠惑衆潛謀不軌若不先事籌辦絕其根株則涓涓不息將成江河後患何堪設想著各直省將軍督撫嚴飭地方文武實力查緝如有訪獲首犯一面嚴行懲辦

一面准將出力員弁照異常勞績隨案奏請優獎總期
嚴懲首要解散脅從以除奸宄而安良善慎毋養癰成
患貽害地方等因欽此仰見 聖主弭患防萌綏靖地
方之至意當經恭錄咨行欽遵辦理剴切示諭嚴密查
拏在案查湖北地當南北之衝長江連接重湖襄河上
通陝豫武昌漢口尤爲喫重華洋交錯繁雜難稽會匪
到處勾結溷跡其間行蹤詭秘來往靡常本年沿江上
下教案疊出輪船往返時有刦奪之案湘省會匪素多
去年至今乘機煽亂巨案迭出春間湖南省稟報拏獲
匪首李典旋經江陵縣拏獲與李典同夥放票之匪首

葉坤山其襄河一帶上起光化襄陽下至漢陽近日會匪甚多本年三月間於京山天門交界之黑流渡朱家廟地方訂期聚眾起事當經派撥員弁分往查拏始各驚散八月間上海鎮江等處盤獲英人梅生私運軍火臣等承准總理各國事務衙門來電滬關盤獲梅生據供匪黨大小頭目均在漢口而不肯舉其姓名令設法密捕消患將萌又准南洋大臣劉坤一電據梅生供稱匪目係漢口人現在長江一帶不肯說出姓名各等因自本年春夏以來臣等因湖南會匪萌動沿江教案紛起亂徵已見疊經嚴飭地方文武暨水陸防營清查保

甲整頓操防一面懸示重賞購拏渠魁茲復遴派候補知府李謙總司漢口緝匪事宜飭令選募健勇廣購眼綫會同管帶水師健捷前營提督謝得龍乘輪沿江上下查拏躋緝旋據該府李謙督率委員縣丞胡子功把總徐堂拏獲匪首濮雲亭楊清和桂金亭等並遠近訪緝匪蹤提督謝得龍拏獲袁老么章金彪省城查街委員典史蔡鴻熙巡檢王家瑞把總馬玉陞等拏獲陳華魁署漢陽縣知縣陳夔麟督同漢陽縣丞黃新鶚拏獲李紫榮並協同李謙捕獲各匪候補副將張國棟拏獲聶海秋漢鎮都司高長洪協同各員緝獲各匪署武昌

府知府李方豫督飭代理武昌縣知縣鍾期濬拏獲高德華尹中安余啟宇楊老二並搜出各匪頭目姓名單又各該員等先後緝獲匪目多名及江陵縣知縣龍兆霖督率署沙市巡檢陸顯仁先行拏獲之葉坤山一併發交武昌府委員等分別提犯馳往會鞫訊據高德華卽高松山供係武昌縣人向在揚州入會後自開楚金山護國堂供奉洪世武祖光緒十五年五月在上海會遇因案正法已革提督李世忠之子李洪號雨生說他是會中大哥擬邀各路同會的人與他父親報仇已託洋人在外洋購辦軍火器械到齊卽行約期起事要該

匪與他幫忙出力後來定封大官並說各路頭目應授官職候起事後大衆公同商議今年六月初間李洪專信知會該匪及各處頭目說軍器已經辦就叫該匪等約齊會議起事七月初一到安慶蔣雲家濮雲亭劉高升張慶庭龍松年許文魁們都先後趕到商定十月十五日各人邀集黨與分爲兩支該匪同蔣雲等爲下游一支在安慶會齊李典同李得勝等爲上游一支在沙市會齊同時豎旗起事又商量下游一支中又分爲東西南北中五旗濮雲亭統東旗劉高升統西旗張慶庭統南旗該匪統北旗蔣雲許文魁統中旗奉李洪爲大

元帥旋因下游一帶水陸各營甚多礙難聚集各頭目互相知會七月十三四五六等日都到大冶縣三夾地方假名做孟蘭會再行商議該匪十五日前往到齊五六十人大家會商沙市兵勇不多又與湖南四川連界官兵追來也有退步仍約定十月十五日起事並商派各頭目在漢口黃州樊口黃石港三夾楊葉洲武穴九江大通蕪湖金陵鎮江十二圩各輪船碼頭均行布置預備船隻等項該匪旋回鎮江八月在鎮江聽說鎮關滬關查獲洋人軍火該匪害怕到漢口住了半月因查拏甚嚴又逃回本籍就被兵差獲案濮雲亭供係貴州

松桃廳人幼爲髮匪擄去後在淮軍當勇入哥老會已二十餘年先是天台山堂後因認識陳華魁高德華等在清江浦開山是聖龍山明義堂今年六月同在安慶蔣雲家與龍松年們商議十月十五日起事派統東旗因安慶查得嚴緊龍松年與熊啟渭袁孝春等坐堂議事叫該匪八月到沙市安排十月十五日起事陳華魁卽陳德才供係江夏縣人向在安徽當勇與濮雲亭同會開堂經濮雲亭供指陳華魁人極凶橫同會兄弟都畏懼他凡開堂要陳華魁在場壓服余啓宇供係武昌縣人向在李典名下入會去年與劉金魁另開北山堂

爲正龍頭各會頭目都曾見過約於十月十五日在沙市起事叫該匪在黃州樊口預備船隻接應尹中安供係大冶縣人向在李典名下是蓮花山義順堂今年各頭目約十月十五日起事囑該匪到沙市河街找開茶館的葉坤山李洪的事也聽高德華說過李紫榮卽李華堂供係湖南耒陽縣人聶海秋卽聶海山供係湖北雲夢縣人曾與湖南耒陽拏獲之劉健宏等結爲哥老會李華堂爲大哥係北梁山荊義堂因劉健宏被獲逃至漢口經耒陽縣稟聞密飭設法拏獲聶海秋在漢口開堂賣票被勇丁誘獲於二犯起出票布及口號海底

簿有坐堂陪堂刑堂禮堂等名目且多有悖逆語句葉坤山供係四川江北廳人向在李典名下蓮花山義順堂到處放票傳人入會李典爲正龍頭該匪爲副龍頭搜出僞印黃綾票件並據尹中突供指葉坤山是總頭目龍松年的幫辦各等情查以上各犯所供約期十月十五日在沙市豎旗起事或先到沙市糾黨布置或分布下游預備接應悖逆情形顯然有徵實屬罪大惡極武漢人情浮動華洋雜處謠言沸騰當令臬司督同武昌府訊取確供均立予正法梟示以昭炯戒而靖人心其葉坤山一犯亦經荊州府覆訊稟經批飭正法至李

典卽李春陽在沙市客店自帖記名提督銜條向人又稱甘肅補用總兵在岳州供稱係湖南安化縣人向在營當勇領受揚州前經正法之匪首謝廷玉票布付給總統玉龍金象飛虎蓮花四山大元帥偽印上年五月在沙市開立蓮花山義順堂放票二百餘人嗣又來岳放票在會內稱爲龍頭大爺在福建稱小霸王等情據被誘同夥之犯劉鵬搏供稱李典開過山堂四次自向劉鵬搏說曾放票六萬餘張並親書李典所傳口號語多悖逆當將偽印票板搜獲查高德華尹中安等供內李典僞稱開山王查出鈔錄李典所傳口號夥黨與劉

鵬搏在湖南所供無異幸經管帶振字營副將顏武林等在岳州府城外拏獲查該匪已在荊州布黨多人復又至岳州勾煽希圖將荊岳聯爲一氣實屬狡謀叵測經臣之洞批飭迅速正法以杜逆謀此案出力人員應由臣之洞會同湖南撫臣張煦另案奏請獎勵至李洪卽李雨生雖據高德華供稱爲李世忠之子查訪李世忠親子向來尙屬安分有已中副榜者聞其義子中有李洪之名當經電達總理衙門在案惟李世忠舊部多而且雜其義子亦甚多鄂省實無從得其確據總之高德華旣供明其號爲李雨生則以名號互相印證當可

蹤跡現仍密飭員弁並咨會各省嚴密查拏其各匪供
出匪首多與沿江各省咨電所開匪首姓名符合足見
聲氣相通其中如蔣雲卽蔣潤許文魁經安徽拏獲正
法劉金魁經安徽拏獲譚金榜經江蘇拏獲正法萬松
亭經江蘇拏獲至各匪供出而未獲之最爲著名匪首
龍大勝卽龍松年吳有楚張慶庭龍海騰等亦經鈔單
電咨沿江各省分投密拏此緝獲長江會匪首要懲辦
之情形也其襄河會匪據署潛江縣知縣包鵬飛拏獲
匪首周克明並督同千總銜五品軍功羅心溶率帶勇
丁拏獲陳隄李朝奎李朝寅張庚萬秦開耀鞠老五卽

鞠長貴黃明馨候補知縣京山縣縣丞呂賢笙拏獲李
得勝徐光裕湖北提標前營左哨外委彭廷富拏獲王
耀亭署襄陽縣知縣茹朝政拏獲敦五斤署湖北提標
中軍參將蒯德浦督弁拏獲張榮庭李興五翟寶庭等
鍾祥縣知縣徐嘉禾拏獲金配庵鄆會文李澤湘張必
瑞並於該縣龍會山起獲槍礮火藥礮彈等件荊門直
隸州知州嚴鷺昌拏獲李爲書隨州城汛把總武定雲
拏獲楊華亭等訊據李朝奎供係天門人李朝寅卽李
長寅供係孝感人周克明供係潛江人同供三犯均與
已傷斃之陳隄於上年六月在朱家湖開天福全龍山

其掌一印散放票布起獲票板二方所刊字樣悖逆已極李得勝供係江夏人初入會充插花當家名目後升爲會內新輔大爺與在逃之匪首陳先知均爲大乾坤山頭目散票糾黨常在襄河一帶搶劫行船商旅本年二三月間各該匪於襄河黑流渡搶劫當店王耀亭供係穀城縣人光緒八年在穀城拜韓大發爲師隨句引多人入會韓大發說該匪能辦事當給印布多張該匪又添造印布在河南邊界及襄屬各處放票坐堂後因拏逃至南漳武安堰改換姓名仍依舊串會各等供均屬糾黨煽惑潛謀滋事除陳隄一犯因拒捕格斃李得

勝一犯暫留質證續獲各匪卽行懲辦外其李朝奎李朝寅周克明三犯均據武昌府審訊明確批飭就地正法王耀亭批飭安襄鄖荊道就地正法此緝獲襄河會匪首要懲辦之情形也以上長江襄河一帶拏獲各犯皆係會匪著名頭目其在會中名次稍後者或留作眼綫或酌予監禁其有供詞狡展指證未確者暫行監候質訊應俟訊明分別辦理此外在逃著名匪目仍飭一體嚴拏重賞購緝務獲究辦以絕根株其愚民被匪誘脅入會僅止領受票布並非充當頭目及曾經滋事犯案者概令首悔自新不准兵役藉端滋擾以副朝廷除

莠安良之意臣等查此次哥老會匪勾通洋人結連長江上下三千里匪黨購運軍火圖爲不軌夥黨極多蓄謀至爲深險湖北地處衝繁旣便往來尤易混匿光緒九年三月會匪潛入省城約期爲亂幸經發覺茲查首匪高德華所供各匪會商本擬十月十五日在安慶沙市分支同時起事後又改計十月十五日先在沙市豎旗起事沿江口岸匪黨布滿各犯供證亦皆符合是長江一帶上起荊岳下至武漢以下皆已聯爲一氣一處蠢動處處響應使官兵應接不暇若非先事破獲倉猝揭竿而起荊州重鎮先已可危且本年湖南溆浦靖州

黔陽岳州等處會匪滋事已有數起必致湖湘一帶匪黨紛起武漢下游處處可虞襄河一帶匪徒亦必乘機煽動湖北勇營素單即使迅就剿除而地方震驚擾害已不堪設想仰賴廟謨深遠先事欽奉嚴旨飭拏疊獲首要立予駢誅弭此亂階所有在事出力員弁或越境躡緝不避艱險或深入賊巢奮勇擒拏該匪等逞凶拒捕兵勇合力格鬪實與臨敵無異自應遵旨隨案奏請優獎以資鼓勵除襄陽鍾祥荊門隨州等處所獲各匪首應俟覆加質訊批飭懲辦後查明緝捕出力各員弁再行彙案奏獎外所有此次緝匪業經懲辦各案最爲

出力之鹽運使銜湖北候補知府李謙擬請免補本班
以道員仍留湖北歸候補班前先補用記名提督謝得
龍擬請交部從優議敘候補副將張國棟擬請加總兵
銜補用遊擊漢鎮都司高長洪擬請俟補遊擊後以參
將儘先補用署武昌府知府本任黃州府知府李方豫
擬請賞加鹽運使銜調署漢陽縣蘄水縣知縣陳夔麟
擬請以直隸州知州在任候補代理武昌縣事補用知
縣鍾期濬擬請免補本班以直隸州知州仍留湖北歸
候補班前先補用署潛江縣事補用知縣包鵬飛擬請
補缺後以直隸州知州在任候補候補直隸州知州江

陵縣知縣龍兆霖擬請俟補直隸州後以知府在任候
補漢陽縣縣丞黃新鶚擬請以知縣在任候補署沙市
巡檢本任湖北糧道庫大使陸顯仁擬請加六品銜湖
北試用縣丞胡子功擬請免補本班以知縣仍歸湖北
儘先補用補用典史蔡鴻熙補用巡檢王家瑞均請免
補本班以主簿仍歸湖北儘先補用千總銜五品軍功
羅心溶擬請以千總留於湖北歸標儘先拔補並賞戴
藍翎武昌縣城守營把總祝鎮清督標中營頭司把總
徐堂督標左營二司把總馬玉陞均請以千總在任拔
補據湖北按察使陳寶箴會同湖北布政使王之春具

詳請奏前來合無仰懇天恩俯准照獎以昭激勵出自
逾格鴻慈謹合詞恭摺具陳伏祈聖鑒

硃批李謙等均著照所請獎勵餘依議欽此

添撥勇營分段緝私片

光緒十七年十一月初七日

再鄂省前因北私浸灌淮鹽引地經前督臣李瀚章飭
募鼎字一營駐紮麻城羅田一帶堵緝北私旋因地段
寥闊巡緝難周准前兩江督臣左宗棠咨商添募一營
共爲鼎字正副兩營駐紮巡緝內有一營薪糧由淮鹽
督銷局支放經前兼署督臣彭祖賢附片奏明在案本
年夏間沿江教案迭出會匪乘機煽亂武漢根本重地

勇營單薄不敷分布當經飛調鼎字副營來省駐紮以資彈壓但留提督周得升自帶之鼎字正營一營巡緝北私此緝私之一營餉項仍歸淮鹽督銷局支發惟自鼎字副營調省以後北私頗形充斥疊准江督臣劉坤一咨請另撥勇營堵緝鄂省無可調撥再四籌維查有駐防襄樊鳳字馬隊前後兩營共馬勇三百二十名向係分派楚豫邊界堵緝潞私當與劉坤一商酌惟有將此項馬勇添募足成五百名上起襄樊隨棗下至應山黃孝勻撥分紮協同鼎字正營聯爲一氣將北潞二私一律堵截所有勇餉馬乾帳棚雜費每年約需銀一萬

數千兩鄂省款無所出已准劉坤一商允咨覆由江南撥給外籌之款以資添募當經派委儘先副將劉恩榮挑募淮北河南精壯勇丁一百八十名照數采買配足馬匹編爲鳳字馬隊中營與鳳字馬隊前後兩營原派營官參將丁季陞守備楊紹文勻分地段實力巡緝卽委安襄鄖荊道朱其煊兼充此三營營務處就近考察約束此一營專爲緝私而設餉歸江南外籌與鄂省勇營餉章無涉如江南撥款不敷由湖北另行籌捐補足復於黃安黃陂一帶添撥提督宋德鴻鴻字營兩哨補紮疏漏地段計添撥之馬步各隊人數已與原紮之鼎

字正副兩營相等通力合作足可截堵北潞兩私以暢
淮銷至襄陽德安黃州一帶現正查緝會匪此項馬隊
既經添募整飭時常巡哨邊境於皖豫邊界盜匪亦可
藉資防緝於地方不無裨益

硃批該部知道欽此

測繪輿圖懇請展限摺

光緒十七年十二月二十
六日

竊照光緒十五年十月二十八日准會典館咨恭頒欽
定輿圖格式限期一年測繪省圖府廳州縣圖各一分
附以圖說解送到館等因當經前督撫臣通飭遵辦惟
州縣諳悉輿地之學者甚少又無測繪儀器以故茫然

無從下手本年四月二十八日復准會典館咨到續定
章程五條及表格一紙精切詳密始獲有所遵循疊經
轉飭湖北藩司會同善後局司道分別撥款遴員設局
開辦各在案竊惟會典一書分典例圖三門典例所不
能詳者每藉圖以著明而輿圖一門關係重要爲用宏
多吏事軍事皆所取資而軍事尤爲切於實用康熙間
中外戡定遣使四出測繪輿圖詳載經緯度分乾隆間
高宗純皇帝欽定輿圖列入會典兵部迄今泰西各國
咸以測繪輿圖專屬之武職各員仰惟聖人立象垂法
範圍莫外實足爲萬世準繩查測繪輿圖大要在詳於

山水之形與道里之數而地形與天度相應非將經緯度數實測實量則山川形勢道里遠近必多差誤湖北素稱澤國境內之水江漢爲大江水西自巴東東至黃梅約行二千三百餘里漢水北自鄖西南至漢陽約行一千九百餘里江漢交匯湖港雜出民生利病此爲大端必應將流向曲折經過郡縣匯注分流之支派交錯斷續之隄垵吞吐順逆之穴口漲落廣狹之水界及當衝沙洲緊要閘壩從前湖身河道之可考者一一實測依率爲圖始裨實用至境內之山則以鄖陽施南宜昌爲最多襄陽荊門次之嘉慶中教匪跳梁賊蹤出沒其

間致稽征討山勢縣亘毗連川陝多扼塞天險之區人跡不到之地測量者測山較難於測水必應分別枝幹以人行道里繞測山麓及山峯立距平距之數深山僻遠雖難遍歷亦必測定山峯平距高低山脈斜度紆曲之勢山水形勢不差道里遠近悉合則疆域城鎮驛站營汛之類始各有所附麗以成分圖總圖前准會典館所頒表格詳敘天度經緯而山之要隘鑛產水之圩堰津梁均列其下最爲得其要領所有各府及直隸州廳各圖自宜博考事實附以圖說簡括著明不得空談形勢其各州縣分圖卽遵照表格之式詳悉填注無庸另

撰圖說迭據鄂省各府州縣陸續繪送諸圖查與會典館格式章程多不符合自應博訪精通算學能用儀器之人分詣湖北六十八州縣治所測天定度詳審形勢於四邊之界測其經緯度分與地面鳥里及人行里開方命率如法成圖方有實際當於本年五月在省城開設輿圖總局派委道員錫璋蔡錫勇會同藩司善後局司道遴選人材購置儀器擬議舉辦揀委分省補用知縣鄒代鈞爲總纂湖北卽用知縣劉翰藻爲提調招致員紳教授學生以三十二人分爲四路每路八人共測一州縣之地復派員紳三人住局校定圖稿共計專司

測繪者十六人既須通曉測算又須涉歷險阻薪水夫馬之費自宜略予從優至於測量儀器有必須購備者如經緯儀度時表以測天空各曜高弧並校求時差定各州縣治所及山川險隘市鎮之經緯測向儀記里輪銅鍊尺以測地面烏里及人行里水道湖隄山勢之遠近奪林儀風雨表以測山峯之高低均經轉向外洋價買漸次購齊惟各種儀器殊鮮通曉善用之人必須轉相教授學習通曉之後又須精練目力手力若持器稍有動搖目力稍有模糊在天度如差一度在地面卽差二百里事理精微非倉猝所能嫻熟湖北各府州縣西

北多山東南多水既鮮平原曠蕩之區跋涉艱難復須實測實量以期詳審精當實非會典館所定一年限期所能竣事現在分爲四路測繪八人共測一縣約月餘可畢四路可畢四縣統計以兩年測地一年繪圖三年始可竣事如能多得精於測量之人設法趕辦至速亦須兩年有餘測量夫馬之費概由局發不致累及州縣合計省內省外需用經費及購備儀器繪刻工紙各項需款甚鉅鄂省庫儲支絀實無閒款可籌又未便派累州縣此係奉旨飭辦之件關係通省水利江防邊防擬請卽在善後局釐金項下動支以應要需總期於餉需

不致貽誤以上各節據湖北藩臬兩司會同善後局輿
圖局司道詳請奏咨前來臣等查湖北地處上游綰轂
南北形勢最爲衝要江漢兩大水腹地諸湖河一切水
道隄工非有精確圖本其形勢不能瞭然而鄭宜施三
府萬山叢雜界連川陝伏莽易生素爲邊防戰守喫重
之地輿圖之作實於地方利害得失所關匪細前撫臣
胡林翼因繪本省輿圖推及各直省畫圖悉遵內府圖
式惟當軍務倥傯之際未暇詳求測算茲以寰宇鏡清
恭逢朝廷簡命儒臣纂修會典頒發輿圖格式章程自
宜詳慎從事方能精確適用查會典館原奏內稱多一

圖有一圖之用多一番考訂收一番考訂之功此事亟須求詳舉辦不宜更緩期限卻不可太迫又續發章程五條內開實測天度經緯以爲開方計里之根宜詳毋略此係第一要事不得草率含糊以圖塞責等語實爲切中窾要測繪事體繁重原限一年實難告竣合無仰懇天恩俯准自本年五月起展限兩年俾得詳細測繪以求精當而免訛誤臣等仍當隨時督催趕辦不令稍有耽延

硃批著照所請該衙門知道欽此

添募勇營變通營制摺

并清單 光緒十七年十月二十六日

竊照鄂省前因會匪滋多口岸衝要兵力單薄備禦空虛當經奏請增募營勇一千名以遏亂萌而維大局並因統將乏人附奏請將記名提督熊鏞生由湘調赴湖北差委先後奉旨允准咨行欽遵辦理各在案查鄂省水陸交衝均資控馭陸勇需用固多而荊州宜昌地據上游最爲喫重南則重湖浩渺北則襄河縣長伏莽均多長江襄河雖有水師然係按汛分駐地闊船稀不能多有移調熟察近日事勢遇有事端防遏策應非有活便肆應之水師不可而鄂省餉力極絀斷難再行奏請添募臣等督同司道將領再四籌商兼權並計惟有變

通營制爲水陸兼顧之舉現擬將新募勇丁令其水陸兼習編爲三營每營設長龍船一號每號勇丁二十名舳板二十號每號勇丁十三名以四號爲一哨分爲五哨每船設哨官一員每營設統領哨官五員營官一員三營設統領一員因係水陸兼用統領未便兼帶中營應另募親兵四十名查水師舊章舵工頭工礮手等爲一船安危所繫關係最重各有專司材藝旣非一致口糧自宜略有等差前人立法具有深意自屢經改章裁減以後營哨用度不敷頭目同於散勇火夫不能開支動多窒礙於是統領營官不能不自行設法通融暗減勇

數以爲津貼哨官頭目火夫之用不肖者以此藉口短缺愈多剋扣日甚不可究詰殊爲有名無實徒令營制廢壞茲仍查照從前水師舊章其長龍艙長舢板頭工礮手之名目等差未便概從刪除混於衆勇以期駕駛可恃臨陣得力合計三營共勇丁八百四十名親兵四十名較之原奏募勇一千人之數有減無增水師一船之勇卽作爲陸路一棚遇有陸路調用長龍留勇四名舢板留勇三名守船餘俱登岸營哨隊伍仍各井然不紊查長江水師章程本於岸上操場兼習陸路技藝茲於省外江岸建造營房一所令此三營中輪派一營駐

紮岸上精練陸路槍隊其兩營在船精練水師每營一月周而復始如遇水陸何處需用臨時酌量調派或三營均作水師或三營均作陸隊或水陸分用均可因時制宜卽委奏調湖北差委記名提督熊鐵生充當三營水陸統領此三營卽名爲鐵字營選派記名提督楊友益充當中營管帶提督銜記名總兵張星元充當左營管帶提督銜補用總兵羅進春充當右營管帶均於本年十二月初一日分投開招至十二日一律募齊點驗成軍所有應領器械等件由善後局照章核發長龍舢板礮船委員估定價值領款修造現募之營豫將營哨

隊伍編定先操陸隊俟明春礮船造成卽行兼習水師
惟此三營水陸兼操一營抵兩營之用應支月餉自應
參酌鄂省水陸營制餉章變通辦理略予從優酌照舊
章以期得力該營統領每月支薪水銀一百兩公費銀
一百兩營官仍照步隊營官月支薪水銀五十兩公費
銀一百兩領哨月支薪水銀十二兩舢板哨官仍月支
薪水銀九兩長龍艙長舢板舵工親兵什長各月支口
糧銀三兩六錢舢板頭工礮手各月支口糧銀三兩三
錢其餘正勇仍月支口糧銀三兩其稍優者亦皆係舊
章所有三營薪糧統計大建月支銀四千一百八十兩

零七錢小建月支銀四千零八十八兩五錢一分計照光緒十一年湖北改定步隊兩營章程每月多支銀六百八十餘兩查鄂省地多澤國水師尤不可少現因限於餉力不能添募水師故爲此三營水陸兼用之計餉需較之前奏一半之數每歲僅多銀四千餘兩設有緩急隨宜調撥既不爲江湖所阻亦不爲山谿所限一軍兩用通盤籌計所省已甚不少實屬費少益多不能不酌量變通未敢拘泥前奏此軍係水陸兼操倍極辛勤他營自不得援以爲例所有餉需查照此次奏案以一半動支正款一半由商民捐款支放據湖北善後局司

道開具清單詳請具奏前來除照章飭取統領營哨官弁勇丁銜姓花名清冊按季咨部外謹照繕清單合詞恭摺具陳伏祈聖鑒

硃批著照所請該部知道單併發欽此

謹將湖北新募鐵字中左右三營酌定水陸兼操營制餉章繕具清單恭呈御覽

計開

一統領官一員月支薪水銀一百兩公費銀一百兩不扣建親兵四十名內什長四名月各支口糧銀三兩六錢正兵三十六名月各支口糧銀三兩均扣建

一每營營官一員三營營官三員月各支薪水銀五十兩公費銀一百兩不扣建

一每營領哨官五員三營領哨官十五員月各支薪水銀十二兩不扣建

一每營哨官十五員三營哨官四十五員月各支薪水銀九兩不扣建

一每營長龍一號舳板二十號三營長龍三號舳板六十號每長龍艙長一名共艙長三名月各支口糧銀三兩六錢扣建

一每營舵工二十一名三營舵工六十三名月各支口

糧銀三兩六錢扣建

一每營頭工二十一名三營頭工六十三名月各支口糧銀三兩三錢扣建

一每營礮手四十四名三營礮手一百三十二名月各支口糧銀三兩三錢扣建

一每營勇丁一百九十三名三營勇丁五百七十九名月各支口糧銀三兩扣建

一每營船長舵工頭工礮手勇丁二百八十名月支柴油銀八兩四錢三營船長舵工頭工礮手勇丁共八百四十名月共支柴油銀二十五兩二錢扣建

一舢板每號月支公費銀三兩每營舢板二十號共支公費銀六十兩三營舢板六十號總共支公費銀一百八十兩不扣建

以上通共大建月支薪工口糧銀四千一百八十兩零七錢小建月支銀四千零八十八兩五錢一分

辦結宜昌教案摺

光緒十七年十二月二十七日

竊光緒十七年七月二十九日據署宜昌府知府逢閏古署東湖縣知縣許之璣電稟本日早間宜昌府城外地方有因尋幼孩焚毀天主教堂之事當經臣電飭該

府縣等確查啟衅詳細情形迅將爲首滋事之人拏獲
稟辦並派委荊宜施道方恭釗候補知府裕庚馳往宜
昌會督府縣切實查辦去後嗣據該道府縣印委各員
會稟稱查明教堂洋房被焚情形迭經會督營汛分途
查拏先後拏獲滋事各犯朱發金趙宗雅汪望王德娃
子李宗義楊長生何燮臣余五豹子高正洪黃順榮易
白熊宏發等十二名督同逐一研訊此案實因法國聖
母堂誤收民人游姓被拐幼孩啟衅懷疑蓄憤烏合打
鬧失火延燒其時游姓聞知失孩係在教堂赴堂詢問
當經教士令其識認領回並經該府縣向堂中查出收

養幼孩及婦媼六十五名內瞽目者三名眼珠仍在瞽
一目者一名皆係原來因病成瞽均係其父母自願送
養實無一挖去目睛戕殘形體之事據朱發金供認光
緒十七年七月二十九日路過聖母堂見眾人吵嚷聞
係游姓失去幼孩在聖母堂尋出因平日誤信訛傳洋
人有殘害幼孩之說又因見有瞽目小孩數人懷疑逼
憤不服彈壓同眾打鬧聖公會新造房屋並先至聖母
堂同眾上樓亂打一時人多擁擠不知因何起火想係
翻倒洋油引燃所致又至天主堂屋廚房打鬧致竈
內火起延燒聖母天主各堂趙宗雅供打毀聖公會聖

母堂器物並搶取銀兩汪望供打毀聖公會聖母堂郭
洋人花園窗戶器物王德娃子供打毀聖母堂器物洋
醫生屋內藥瓶李宗義楊長生供打毀天主堂及洋花
園物件何燮臣供打壞聖母堂器物並向知縣出言頂
撞余五豹子高正洪黃順榮各供打壞聖母堂及洋房
器具樹木易白熊宏發各供碰壞聖母堂門窗並據各
犯供平素均不相識實係一時烏合各自打鬧並無爲
首之人預謀糾約情事教堂被焚實係打鬧失火延燒
並非有心放火各等供反覆研鞫堅執不移案無遁飾
應卽擬結查例載兇惡棍徒屢次生事行兇無故擾害

良人者發極邊足四千里安置凡係一時一事實情
兇勢惡者亦照例擬發又律載白晝搶奪人財物者杖
一百徒三年若因失火而搶奪人財物者罪亦如之又
故意毀人器物者計所毀之物卽爲贓准竊盜論免刺
罪止杖一百流三千里又竊盜贓一百兩杖一百流二
千里一百二十兩杖一百流三千里又名例載斷罪無
正條援引他律比附又違制者杖一百又不應爲而爲
事理重者杖八十各等語此案朱發金因游姓失孩尋
覓誤信訛傳懷疑逞憤不服彈壓同衆打鬧聖公會聖
母堂以致人多擁擠翻倒洋油引燃起火並打鬧天主

堂以致竈內火起延燒聖母天主各堂審明並無預謀
圖財情事亦非挾仇有心放火惟該犯逞兇肆鬧經地
方官彈壓猶敢不服實屬生事擾害未便稍涉輕縱應
照兇惡棍徒生事行兇無故擾害良人發極邊足四千
里安置例擬發極邊充軍趙宗雅打毀教堂器物並搶
取銀四十六兩有奇除搶奪計贓擬徒輕罪不計外計
毀壞器物估贓在一百二十兩以上應照故意毀人器
物計所毀之物卽爲贓准竊盜論竊盜贓一百二十兩
杖一百流三千里律擬杖一百流三千里免刺汪望打
毀教堂洋房三處器物計贓已及百兩亦應照毀人器

物准竊盜論竊盜贓一百兩杖一百流二千里律擬杖一百流二千里免刺各解配折責安置王德娃子李宗義楊長生何燮臣余五豹子高正洪黃順榮七犯各隨眾打鬧不服約束致壞洋房什物計贓無幾應照違制律均擬杖一百王德娃子李宗義楊長生各係打鬧二處何燮臣不服彈壓情節較重應從重枷號一箇月易白熊宏發二犯僅碰壞窗戶玻璃情節較輕應照不應重律擬杖八十分別折責滿日發落無干省釋等情由湖北按察使陳寶箴覆核議擬具詳前來臣覆加察核均屬允協應卽照詳分別辦理至英法美各國教堂洋

房被焚所失器具什物或係領事或紳商或醫士均屬
無辜受累自應量予撫卹以昭朝廷厚待遠人之意惟
各國領事原開數目較多當經飭委員與之詳加辨論
切實核減並經總理衙門與英美公使辨論核定查三
國中惟法國教堂房屋最大器具毀失甚多議給洋例
銀十萬兩英國損失家數較多議給洋例銀六萬六千
八百六十一兩又洋九百十元美國只教堂一處議給
洋例銀八千兩以示體恤共折合庫平銀十六萬四千
五百九十六兩三錢九分二釐內由司庫撥銀三萬八
千零四十四兩零四釐由宜昌關稅撥銀十二萬六千

九百五十二兩三錢八分八釐飭據江漢宜昌兩關道暨委員候補知府裕庚與各該國領事往返妥商定議均無異言當令將撫卹銀兩先後送交各領事轉給完案

硃批該衙門知道欽此

煉鐵廠添購機鑪請撥借經費摺

光緒十八年二月二十七日

竊臣前於光緒十六年十一月將勘定煉鐵廠基籌辦廠工及開采煤鐵事宜分晰奏陳並將機器廠工一切經費約估大數共需銀二百四十六萬八千餘兩咨報海軍衙門暨戶工二部立案並聲明事皆創辦約略估

計不免疏漏此外續添料件續增用費恐尙有溢於原
估之數等因各在案旋承准海軍衙門會同戶部先後
奏撥煉鐵經費銀二百萬兩令就撥定之數開廠煉鑄
設法勻籌樽節辦理各等因咨行到鄂均經轉行遵照
辦理茲據湖北鐵政局司道詳稱伏查鄂省開設煉鐵
大鑪日出生鐵百頓並有煉熟鐵煉鋼煅鑛各鑪酌用
抽條夾板造軌各項機器詢據外洋工師僉謂在外國
亦稱大廠更兼采鐵煉鋼開煤三事合而爲一復有修
運道鐵路築江隄設化學鑛務學堂添修理機器廠皆
連類而及必不可少之費據洋匠約估若在外洋非銀

三百餘萬兩不辦當以中國人工易集物料較廉竭力
撙節約估需銀二百四十六萬八千餘兩詳請奏咨在
案開辦以來覈實動用間有可以節省者亦有溢平原
估之外者截長補短其在原估條目之內者通牽覈計
尙足相準惟此等創辦大舉並無成式可循事理既極
精微情形亦與外洋多異隨時變通補救續添料件續
增用款實有意料所不及思慮所難周萬不能省必須
購辦者卽如各種鑪甄長途轉運破壞過半必須重向
外洋購買方能敷用鐵軌需用之鉤頭釘魚尾片必須
添機自製方免仰給於外洋又外洋煉鐵先看鑛質再

配機爐此項機爐原係在粵購定續經電商海軍衙門
奏明移鄂安設以免另購大冶鐵質過堅不甚合式必
須添配煨鑪爐煨過方能入爐鎔化熱風爐亦須添二
座此皆意料所不及必須隨時添辦者也原議以湘煤
煉冶鐵現經大冶開出煤鑛均係油煤可煉焦炭正與
煉鐵相宜江夏縣屬馬鞍山又覓得油煤隆一處較之
用湖南白煤用度實省自應舍彼就此設法開采惟開
平開采煤鑛費至百餘萬金始見成效鄂省部款有限
自難比照現擬分開小井以期節省而添機需費設焦
炭爐需費煤窿修鐵路以接合鐵山軌道需費遣工匠

出洋學習煉鐵需費此皆思慮所難周必須變通辦理者也至原估化學礦務各學堂卽係爲采鐵煉鐵煉鋼開煤本廠所用而設以備分司各事與此次遣工出洋學習煉鐵均俟習成以後卽可少用洋匠藉可稍節經費亦免造不如式動需改作耗棄工料並非爲日後他處應用之計修理機器廠尤爲本廠時刻相須之事此萬不能省者也除煤窿添接之鐵路約可在原估款中勻撥應用外共需續增款項三十二萬四千六百兩合之原估二百四十六萬八千餘兩共需銀二百七十九萬二千餘兩此雖目前加增工料用款之需皆實爲日

後節省常年經費之處除部撥二百萬兩外尙不敷銀七十九萬二千餘兩明知撥款有定續請殊難苟有可以撙節之處敢不設法勻籌無如工程浩大端緒紛繁廠工須一氣呵成機器皆相資爲用闕一卽難奏效必須廠工告成開出煤鐵製成鋼軌等鐵料運行銷售始能如部議所云收回價本此時委實無從周轉竊思此舉原以濬利源而杜外耗是以海軍衙門始終主持戶部極力籌款萬不能以款項不濟中道停止以致廢要政而棄前功必須鐵廠早成則關東鐵路有所取資可以歲省中國漏卮鉅款而部咨已力言無從應付勢難

再請添撥再四籌維惟有就本省設法騰挪借撥以濟要工茲查上年及本年冬春以來因沿江一帶收成豐稔釐金鹽課兩項收數較旺覈計除支撥京協各餉及本省餉需外尙可勻撥應用擬請在釐金項下動撥銀五萬兩鹽釐項下動撥銀五萬兩兩項共撥銀十萬兩又查鹽道庫存長江水師申平銀一項暨糧道庫存各雜款皆有餘存均係存儲暫不需之款擬請借撥鹽道庫存長江水師申平銀十萬兩糧道庫存雜款銀十萬兩兩項共借銀二十萬兩俟鐵廠落成後銷售鐵料獲有餘利自光緒二十年起分十年勻攤歸還惟以上

動撥借用銀三十萬兩之外不敷尙鉅又查製造槍礮
必鐵廠成後始有鋼鐵第槍礮機器久擱必致鏽壞現
已次第修廠設機惟開造尙需時日鐵廠與槍礮局本
爲一事相爲表裏難分畛域權衡緩急擬卽在上年奏
定槍礮局常年經費內自行酌量勻撥應用似此一轉
移間於部款不至再費籌撥於本省正款毫無妨礙而
鐵廠工程卽可指日觀成該司道等自當督飭各員匠
極力撙節動用斷不致稍有虛糜似此采鐵煉鋼開煤
三事並舉又兼有創修鐵路六七十里較之從前海軍
衙門原估但建鐵廠兩座已需銀二百八十萬兩之數

實不爲多經此次續估之後斷不至再有請添之款開具續估數目清單詳請奏咨等情前來臣查設廠煉鐵及開采煤鐵各事宜開辦以來皆經臣悉心督察時時籌計事事撙節無如廠大工精端緒過繁中國創辦此舉一切類非習見習聞之事至運道馬頭機礪等事皆須因地制宜洋匠估計亦實難周悉無遺查前兩江總督沈葆楨開辦福建船政之時營建鑄鐵打鐵各廠原估用款銀四十萬兩續估多至一百餘萬兩均經奏明有案具徵創始之事估計工料確數實難豫定此案原估用款大數銀二百四十六萬八千餘兩咨部立案卽

經聲明係約略估計不免疏漏此次續增用款銀三十萬四千六百兩均係隨時補救變通萬不容已額外增出之款項並非與原估前後參差且增出用款添購機器礪座居其大半其工用需費亦屬無多而添購之機器增開之煤井以及接修煤窿鐵路資遣出洋學習工匠皆係爲將來開濬利源節省經費之計所增止此所省實多方今戶部支絀籌畫維艱臣所稔知前次部咨既力言再請續籌戶部實無從應付自係實在情形斷不敢再請由內撥款惟二百萬斷不敷用臣早經計及是以光緒十六年三月初十日曾經電達海軍衙門

聲明部款二百萬之外其餘不足之款當竭力籌畫等因在案現在惟有就本省設法騰挪籌撥以應急需茲擬勻撥釐金鹽釐兩項銀十萬兩於部撥京協各餉不致妨礙其擬借鹽道糧道庫存申平雜款銀二十萬兩由鐵廠分年攤還於款項初無出入其餘均在奏定槍礮廠常年經費項下移緩就急勻撥應用並非格外請添之款臣自當督飭該局司道等樽節迅速辦理目前關東鐵路工程緊要不能延緩鐵廠早成一日則中國漏卮早塞一日將來鐵廠成後臣當設法籌計所有用過官款仍可逐漸收回合無仰懇天恩飭下海軍衙門

戶部迅速議覆俾各項應手得以趕辦廠工早日觀成
以竟全功

硃批該衙門議奏欽此

張文襄公全集卷三十一終

吉林慶珍校

張文襄公全集卷三十二

奏議三十二

查辦湖南刊布揭帖偽造公文一案摺

光緒十八年三月十二

十五日

竊臣等前經承准總理各國事務衙門咨開匿名揭帖本干例禁立法甚嚴自髮逆掃平後地方乂安而散勇惰民思欲藉端爲亂輒假西人傳教爲言刊爲書說編作歌謠繪爲圖畫率皆鄙俚不經不堪寓目而愚民無識往往爲所煽惑甚或釀成巨案迭准德國使臣屢次送到刊板書籍說詞歌曲畫圖種種並有捏造總理衙

門公文及督撫文函各件居心甚爲詭誕此等謠言微
特有礙邦交卽中國內治亦宜嚴懲咨行通飭各屬查
禁究查捏造之人從重懲辦以消隱患並迭次承准電
開長沙府有周漢開設寶善堂鄧懋華書鋪刊刻詆毀
洋教書籍布散甚多查各處教案之起皆由造言生事
者搖惑人心各書皆由湖南而來有三家書鋪鄧懋華
曾郁文陳聚德皆代周漢刻書各等因均經通飭嚴禁
並行湖南臬司嚴切查究本年二月承准總理衙門電
催辦理當經臣之洞電請總理衙門代奏派委湖北督
糧道惲祖翼馳往湘省會同湖南臬司確查稟覆奏明

懲辦奉旨允准在案茲據該道惲祖翼自湘回鄂會同署湖南按察使呂世由稟稱查此案先經該臬司飭據長沙府知府趙環慶稟稱查得周漢係甯鄉縣人由軍功薦保道員留陝西補用向以寶善堂之名在湖南省城刊刻善書蹤跡無常現在遠出未歸鄧懋華曾郁文陳聚德三人均以刻字爲業曾郁文已於上年身故當訊據鄧懋華供向在長沙省城小西門內路邊井獨自開店刷賣帳簿並未與周漢合夥刊刻書籍惟與之熟識往來上年周漢曾至店中寄居數日隨即出省有時言語荒誕狀似瘋迷其所輯各種善書聞係陳聚德曾

郁文代爲刊刻據陳聚德供開設刻字店多年曾代周漢刊刻得一錄官紳寶訓育嬰良法拯溺寶筏格言聯璧傳家寶訓擴充惻隱各種善書所有板片隨時取去自行刷印夥店人數衆多不諳文義向來刻書照字算錢不問來歷所有辣手文章等書並一切畫圖是否間有店夥代刻實在記憶不清據曾郁文店夥吳東海供店主曾郁文曾代周漢刊刻善書已於上年身故至於毀罵洋教書本曾否刊刻實不知情自奉將店門封閉各夥俱已散去各等供該道到湘當卽會同該司派委湖南候補通判蔣聯庚馳赴甯鄉查傳周漢解省訊究

旋據該員會同甯鄉縣知縣鄭之梁稟稱周漢自光緒十年由新疆請假回籍隨即攜眷出外至今並未復回原籍當將周漢胞姪周德之戶族周昆玉團總唐篠楠鄰右黃樹秋一併傳解來省經該府訊據周德之供周漢係其胞叔自光緒十年回籍後即攜眷出外隨意遨遊六七年來並未回至甯鄉近患痰疾時發時愈病劇時言語不清有似癲狂又羨慕神僊自稱鐵道人最信扶箕平日雖不信洋教並未編刊書歌圖畫各處布散或係不逞之徒因伊叔周漢保至監司大員託名刊刻並捏造總署湘撫公文及致鄂撫書信希圖聳聽亦未

可知質之戶族周昆玉團鄰黃樹秋唐祿楠等各供相同惟所有書歌圖畫究係何人秉筆未能得其主名自應先將板片搜獲銷毀淨盡以副朝廷輯睦中外之至意當經該府督同長沙善化兩縣懸賞購覓並恐民間心懷疑懼知而不舉特於賞格內聲明隨繳隨賞並不追究來歷復派差分路搜尋始據長沙縣民萬富安等陸續繳到鬼叫該死辣手文章擎天柱滅鬼歌稟天主邪教並圖畫各種板片計三十一面共二十五塊內多殘缺不全自係畏罪毀棄所有板片及人證供結均由該府稟解該司道等親提覆訊所供均與該府原訊相

同誠恐尙有不實不盡究竟周漢是否在家避匿並該書鋪等有无諱飾情事復向周德之究詰據供伊叔周漢實係由新疆請假回籍後攜眷外出行蹤靡定平日不喜洋教僅止信口詆訾委無刊刻書畫各處散布情事且身係職官斷不敢偽造公文其致湖北巡撫信函伊叔並未到鄂省從不好與官場往來顯係他人假託總因伊叔是四品大員平日好發議論是以匪徒盜竊姓名希圖易於煽惑提訊戶鄰周昆玉等供詞俱同復訊據陳聚德供曾經代周漢刻過善書數種實未刻過毀教書畫該鋪在省開設多年代人刊刻善書主顧甚

多向來照字算錢書板隨刻隨取其帳簿或僅記一姓或僅記一堂名或係輾轉交來實不能概行登記姓名且店夥甚多來去無常這辣手文章等書其中是否有店夥刊刻者委實無從查悉如有代周漢刻過毀教諸書亦只係工匠受雇該鋪並不知情儘可據實供明何必代爲捏飾自受拖累又提鄧懋華再三質對堅不承認代刻書畫惟據供與周漢熟識遇其肆口妄論之時不免羣相稱贊事所時有反覆研鞫供仍如前加以刑嚇矢口不移該司道等因案關重大不厭精詳復飭長善兩縣確查周漢實係早經外出久未在省又經派員

明查暗訪咸謂周漢患有心疾語言怪誕近來痰迷更甚見人動輒謾罵至刊刻毀教等書圖等事並無聞見異口同聲供證既屬確鑿應卽據供擬結查周漢遠出未歸痰疾旣劇言語支離卽使傳喚到案亦難訊取供詞業已傳到該家屬及戶族團鄰人等嚴訊明確僉供周漢並無刊播揭帖及捏造公文等件情事衆供如一稱係匪徒託名偽造希圖煽惑尙屬可信卽如致鄂撫信函一節湖北撫署號房並未接收此信其爲假託捏造更屬無疑惟周漢以在籍道員專好扶箕諂信鬼神語言怪誕跡類瘋狂病發之時乖謬尤甚逢人輒罵此

等形狀仕途罕見自應稟請奏明予以懲處以儆謬妄而免生事書賈鄧懋華既知周漢形類瘋狂性好生事仍復與之往來遇事稱贊殊屬無知附和陳聚德平日代人刊刻書籍並不查詢來歷又不看明書畫內文義有無流弊任令店夥誤行刊刻以致滋生事端均有不合鄧懋華陳聚德均請照不應重律各擬杖八十加枷號三箇月滿日折責發落吳東海訊係曾郁文幫夥不知店務應與病故之曾郁文均無庸議仍將各該鋪永行封閉不准復開無干人證省釋免累至匪徒竊名造言刊播揭帖希圖煽惑已屬可惡並膽敢偽造總署督

撫公文四處傳播尤爲大干法紀除由司道飭湖南各屬一體訪查務得主名嚴拏究辦外合將查起書圖各種板片彙同供招戶族團鄰甘結並地方官印結呈繳稟請會核具奏等情前來臣等查西人傳教乃條約所准行久已中外相安民人入教與否聽其自便西人亦不强人必從其教教堂如實有不近情理不合條約之事儘可稟官照會查辦何得捏造不根之言惑衆生事況現值沿江各省嚴辦會匪之際豈容推波助瀾擾動大局此案周漢雖查無刊播揭帖及偽造公文情事惟該員以在籍四品職官理應謹言慎行矜式鄉里乃平

日專以扶箕爲事惑於鬼神言語荒誕跡類瘋狂近來
痰迷更甚見人動輒謾罵以致匪徒假託其名偽造公
文造言煽惑自未便漫無懲戒致令滋生事端相應請
旨將在籍花翎陝西補用道周漢暫行革職查傳到籍
交地方官嚴加管束不准潛至省城妄爲生事仍隨時
察看將來痰疾如能痊愈果能謹飭改過再行申請核
辦儻瘋狂益甚滋生事端卽據實稟請奏明嚴懲其書
賈曾文郁業經身故鄧懋華陳聚德自應各予懲儆應
照該司道等所擬辦理至竊名刊播揭帖偽造公文信
件之匪徒臣等自當督飭該臬司嚴飭各屬實力查緝

務獲究辦以儆效尤其起到書圖各種板片由臣之洞
派委江漢關道孔慶輔眼同漢口領事銷毀

硃批該衙門議奏欽此

籌款合修同仁隄工竣摺

光緒十八年五月二十日

竊查湖北黃梅縣與江西德化縣安徽宿松縣濱江連
界共管之同仁隄關繫三省利害係於道光十八年由
湖北督撫臣奏明蒙恩撥發庫款銀十萬兩創建計長
一千九百餘丈隄成編列康樂和親安平六字號責令
黃梅德化宿松三縣業民按畝分承歲修保固厥後遂
爲三省公隄遇有改建大工歷由三省勻籌借撥經費

通力合作光緒十六年七月因江水增漲該隄冲刷塌卸勢甚危險由黃梅德化宿松三縣會稟估修並准江西安徽二省先後咨商到鄂飭據該三縣會稟勘得該隄和字號與親字一號起至五號止隄岸坍塌擬自樂字號老隄起至安字號丁家口止勘定基址改建長隄一道藉資捍衛計長一千一百三十八丈五尺估需經費二萬五千九百七十餘兩三省分派每省應發銀八千六百五十七兩零懇卽撥款興修等情臣等查該隄雖係官督民修遇有大工向係三省勻籌經費同治年間曾經撥給賑款應用及借款興修緣黃梅縣屬低鄉

居多每遇江水稍漲田地輒被淹沒近年長江自九江一帶南岸沙淤漸寬北岸江溜衝刷日甚是以連年以來均遭水患民情困苦異常該隄關繫三省田廬賦命唇齒相依當此工程緊急之際刻難延緩若拘泥官督民修責令照章集費民力實有難支必致貽誤事機所關非細且歷年雖有借款徵還之說亦係有名無實此次大修急工與尋常歲修培補不同惟有三省會商籌辦疊准江西安徽兩省來咨俱係籌發官款應用湖北省自應力籌合作以竟全功當卽飭司核議籌款於鄂省賑捐項下提撥銀八千六百五十七兩發交黃梅縣

具領並委同知李雯會同該縣及江西安徽兩省印委各員妥商趕辦卽於光緒十七年二月十三日興工四月初二日一律完竣並據該印委等核實摺節工竣餘錢九百千文除備是年該隄防險之資三百千文外所有餘錢六百千文批飭提存發典生息以備同仁隄歲修經費不准挪移他用當經飭委署黃州府知府存厚前往驗收據報承修之隄委係如式修築完固並無草率偷減等情據湖北布政使王之春詳請具奏前來臣等覆核無異除飭將用過土方工料照例造冊並取保固限結詳咨外所有籌款合修同仁隄工竣緣由臣等

謹合詞恭摺具陳伏祈聖鑒

硃批該部知道欽此

裁撤茶商捐助書院經費摺

光緒十八年六月二十六日

竊臣承准軍機大臣字寄光緒十八年五月十一日奉上諭有人奏捐重累商懇恩飭免一摺據稱茶商捐助兩湖書院經費傳聞督臣僅照原定捐章減去三分之一約計各項茶捐每年猶須銀二萬兩內外又有雜費及留難等事種種擾害茶市蕭條國課日虧請飭蠲除等語前據張之洞覆奏酌減抽收茶捐如稍有妨礙及商情不便之處卽行奏明裁撤至今將及一年若如所

奏各情茶商苦累如此該督迄未據情入奏仍著張之洞悉心妥籌務須體恤商艱如果實有不便自應早爲裁撤以蘇商困原摺著鈔給閱看將此諭令知之欽此仰見朝廷體恤商艱之至意臣伏查茶商捐助兩湖書院經費係就該商多年舊案之捐爲兩省培植士林之舉捐數輕減商情樂輸於茶務毫無妨礙臣前奏業經分晰陳明上年奉旨飭查時臣復將捐數奏明酌減爲數極爲輕微並陳明隨時體察情形如稍有妨礙及商情不便之處卽行奏明裁撤自上年覆奏以來並無一呈一稟向臣及撫臣關道衙門投遞者臣隨時博訪周

諮實無稍有妨礙及商情不便之處惟今年春間雨水較多茶市稍爲減色究恐商人不免因此藉口正在飭查核議酌擬停收欽奉前因遵卽悉心妥籌檄飭江漢關道立將此項茶捐卽日出示遵旨裁撤一面札飭湖北藩司江漢關道會同查照鈔奏各節確切查明詳覆去後茲據湖北布政使王之春江漢關道孔慶輔會詳稱遵查原奏所稱兩湖書院經費該茶商迭控求免未准聞茶商具控關道督撫各衙門前後十有餘次均有案卷可稽等語查創建兩湖書院所有兩省人士企望欣忭各情及南茶籌捐經費原委前奏均經陳明在案

此項茶捐各商均知所出甚微收效甚大且所成就者非其子弟卽其戚黨楚弓楚得衆情樂從毫無勉強惟辦運南茶商人各省皆有賢愚不等間有不知大體好訟生事之人曾於光緒十六年開辦之時兩次赴江漢關道衙門呈請邀免當經前署江漢關道李壽蓉江麟瑞先後批飭曉以善舉大義遂無異說同時亦曾向臣及撫臣衙門具呈前經奏明在案自覆奏以後卽無一紙呈稟邀免者至藩司衙門則先後並無一商前來具呈是茶商呈控督撫關道衙門先後共只二次均有案可稽原奏所稱具控各衙門十有餘次等語實爲傳聞

無據之詞現在此捐已停有德豐永聚生和南北茶商
十餘號向督撫藩臬兩司各衙門具控茶葉公所首事
袁雲峯等勒抽私費濫扣盤剝一案詞內猶以創建兩
湖書院爲三楚第一盛舉茶商捐助經費衆擎易舉義
所當輸請革除該首事等向抽私費專就書院捐款免
無益以成有益爲言經臣批飭以捐助書院經費業經
出示裁撤應勿庸議但飭該司道等傳集各商將該首
事自行勒抽濫扣各節澈底查究妥籌裁減濫費整頓
茶務之法此足爲商情樂輸毫無勉強之一證又原奏
所稱驗票驗貨給票換票雜費紛繁藉故留難一節查

前收此捐時係就關道署中派員經理除筆墨紙張之費其餘儘數歸公每日按照茶稅所入核計所售茶箱抽取捐費本無驗票驗貨之煩何至有留難擾累之苦是又不待辯而自明者也又原奏所稱國課日虧一節查漢口茶稅近年較前漸形短絀已非一朝一夕之故光緒十六年一年收稅銀九十五萬七千餘兩十七年一年收稅銀一百零二萬四千餘兩查十六年收捐書院經費之時頭茶已過所捐僅只數月並未全收而十七年全年抽取書院經費之時稅課轉較前加增尤足爲書院捐費無損於茶務國課之明證至近年茶商虧

本之由洋商捐價之故實因茶莊過多每思僥倖朦混製造粗率煙薰水濕氣味不佳兼以劣茶攙雜由於資本不足重息借貸更有全無資本俟茶賣出以償借債者洋商漸知其弊於是買茶率多挑剔故抑其價茶商債期既迫只求速銷償債而成本之輕重不能復計一經虧折相率倒閉其資本充足者勢不能不隨衆賤售茶務之壞多由於此卽如安化茶莊上年甚少安茶遂享大利今年長沙高橋驟開四十餘莊遂致成本大折是茶市之壞正因小販過多開莊搶售之故原奏所稱開莊各情適與現在情形相反亟應力籌整頓之法方

足維持茶務於不做等情詳請覆奏前來臣查該司道等詳覆各節均係實在情形至原奏稱初議開捐時道員曹秉哲捏詞迎合等語查湖北道員並無曹秉哲其人原奏或卽隱指前派會同江漢關道勸辦之道員曹南英而言惟查此項捐款係委該道會同厯任江漢關道勸辦非該道一人所能主持總之此捐無累於商無損於國有稅課之可稽有商情之足驗非臣一人之私言此捐本爲書院及方言商務各學堂經費而設不獨有益於士林兼有裨於商務惟現在茶市減色恐論者不揣其本而齊其末是以體察情形亟議停收以杜藉

口於奉到諭旨後卽行裁撤其兩湖書院及方言商務學堂經費自當另行妥籌辦理

硃批知道了欽此

湘鄂合剿臨湘會匪擒獲首要摺

光緒十八年八月初三日

竊查湖南臨湘縣會匪汪殿臣向來開立山堂糾黨放
飄人蓄逆謀於上年九月在巴陵縣界之大雲山糾黨
嘯聚焚劫居民抗拒官軍當經兵勇追捕逃匿復在臨
湘縣屬之小湄飛鳴山聚眾劫掠又經振宇防營暨岳
州水陸營汛兵勇擊散拏獲匪黨多名惟匪首汪殿臣
在逃未獲前經臣等將剿捕情形奏明在案本年閏六

月臣之洞據湖北通城蒲圻等縣稟報匪首汪殿臣復在臨湘縣屬之漁角亭聚衆豎旗起事近接通城縣境據險設卡張貼僞示僞稱順天王總統乾坤離坎四卦天寶山勒逼遠近各鄉居民進貢通城蒲圻一帶民情洶懼等情當經臣之洞飭派鴻字營勇兩哨分投馳往通城蒲圻扼截拏並經臣等各據稟報分飭岳州府縣防綠各營趕緊併力撲滅嗣據岳州府知府鍾英岳州鎮總兵張捷書振字營統領記名提督余虎恩臨湘縣劉鳳綸巴陵縣陳濬書等先後稟稱該匪首汪殿臣上年在逃未獲此次復夥同僞軍師吳子餘僧思陶卽

夏思道及著名頭目熊名野卽熊名治熊采漢楊金榜
卽楊金圃等復在臨湘之藥姑山漁角亭糾衆豎旗僞
稱王號分派夥黨四出逼勒鄉民獻納財物米糧稱爲
進貢違者燒搶連日誘脅聚黨千餘人勢甚猖獗經振
字營將領弁勇會同岳州城守營長江水師岳州鎮標
弁兵於閏六月二十日夜馳抵藥姑山麓出其不意分
道進攻擊斃匪衆數十名生擒悍黨十九名賊衆不辨
我軍多少紛紛逃竄因天色昏黑山徑紛歧汪殿臣及
僞軍師等均已逃逸當將賊寨一律平燬逸匪有竄至
湖北通城縣境內者亦被勇團截殺訊據該匪王有才

供係僞順天王汪殿臣之西路頭目袁昌益供係會中
三爺李興貴王金玉李定均供係催貢將軍俱拒敵官
軍受有槍矛各傷並供稱汪殿臣蓄謀先取通城次下
蒲圻情形極爲凶狡等情臣之洞當以汪殿臣僞稱王
號頻年謀爲不軌此拏彼竄三次起事聲勢日盛匪黨
日多此次巢穴雖經官軍擊破然三次倡亂之首逆及
各著名頭目均未就獲必致數月之後又復嘯聚滋事
尙復成何事體當經嚴飭該地方文武不准草率了事
仍蹈養癰積習務須澈底搜捕以匪首必獲爲斷惟岳
鄂毗連地段遼闊道路分歧該處防營兵力不敷分布

必須兩省合力圍捕始足以剷除巨患當派委湖北候補道李謙督帶武防營勇兩哨乘輪駛往會同督飭擊辦一面飛飭湖北通城蒲圻等縣防營合力截擊維時提督余虎恩已赴醴陵縣防所巡查邊防臣肫飛飭該提督星夜折回岳州會同澈辦務將各匪首拏獲以淨根株茲疊據道員李謙提督余虎恩等會稟稱該道馳抵臨湘縣桃林地方會同該提督暨該縣劉鳳綸懸立重賞多方購緝分派弁勇督飭團練四出搜捕偵知汪殿臣已將預備資糧率其死黨竄入江西設法斷截其四竄之路旋將僞軍師吳子餘僧思陶卽夏思道僞元

帥張蘭田僞副元帥余正喜僞哨官何添直襲運城李伯鳳等陸續拏獲訊據各犯供稱聽從汪殿臣入會汪殿臣自稱僞順天王各人俱封僞職內李伯鳳一名向在軍營善製各種軍火商議先破通城次下蒲圻仍轉岳州各犯四出糾人各備器械拒敵官軍等情旋於七月十四日經振字營幫辦補用總兵沈玉貴會督各路兵勇團練等於臨湘白鶴峒地方將該匪首汪殿臣圍捕擒獲提犯質訊據供係臨湘縣人曾在甘肅各營當勇久經入會於光緒十五年七月自行開立天寶山玉華堂青龍水仁義香分路糾人起事曾被前臨湘縣擊

獲狡供不認釋放十七年七月四處糾人已多在大雲山定議起事九月內自稱順天王私刻銅木偽印製造各項旗幟軍器火藥徧貼偽示聲稱天兵開世在會諸人都封偽官職迭在巴陵臨湘地方各鄉焚掠經兵勇擊散本年閏六月復在漁角亭豎旗起事四山搭立營棚分段把卡圖謀不軌屢次拒敵官兵等情不諱並據岳州城守千總蔣聲耀拏獲熊名野續又分派弁勇拏獲熊采漢均係起事之大頭目歷供與汪殿臣夥同謀逆糾黨起事不諱又據巴陵縣陳濬書拏獲萬先右一犯亦係歷從汪殿臣搶刦滋事之悍黨以上汪殿臣等

首要各犯均經覆訊確供稟由臣等先後批飭就地正法梟示並飭將上年拏獲監禁之汪殿臣悍黨謝盛愛鄧太和陳炳義李元青湯正渭許明喻李維青等七名一併正法以昭炯戒惟僞元帥張蘭田供尙狡展飭卽研訊確供再行懲辦其餘未獲之悍黨尙有楊金榜係湖北漢陽縣人道士王曉村係江南人均已遠颺已分別通飭移咨嚴拏務獲懲辦現在地方人心已形安謐仍飭該道李謙會同岳州府巴陵臨湘兩縣搜捕餘黨寬免誘脅繳飄自首者概行免罪整頓保甲團練將地方善後事宜切實籌辦以期永杜亂階臣等查匪首汪

殿臣以游勇開堂放飄僞稱王號糾黨千餘人僞封官職蓄謀攻取州縣三次倡亂狂悖已極所收夥黨皆積年軍營散勇驍捷善鬪凶悍異常臨湘之藥姑山界跨湖南北江西三省廣闊二百餘里山林深邃此擎彼竄向爲藏奸之藪若稍一鬆緩該匪竄入深山逃至他省界內則留此禍根乘間輒發終成不了巨患岳州爲湖南第一門戶與湖北水陸處處毗連此處設有擾動則湖北防不勝防實關大局利害該道李謙聯絡文武紳團深知該匪蹤跡窟穴赴機迅速籌畫精詳操縱得法督緝認真未及一月將積年未獲之首逆擒獲其著名

頭目大率俱已就獲該提督余虎恩勇往有爲督隊剿捕立將巨匪迅速撲滅臨湘縣知縣劉鳳綸平日官聲甚好此次查拏各匪在鄉奔馳兩月之久不辭勞瘁緝捕勤能岳州在城文武及長江水師岳州鎮各派兵役團勇協同圍捕俾渠魁悍黨次第成擒弭患銷萌均屬異常出力自應遵照上年六月初六日欽奉諭旨照異常勞績擇尤隨案奏請優獎湖北候補道李謙擬請送部引見並賞加二品頂戴儘先簡放提督前陝安鎮總兵余虎恩擬請旨交軍機處存記遇有提督總兵缺開列在前請旨儘先簡放臨湘縣知縣劉鳳綸擬請以直

隸州知州在任候補並加四品銜補用總兵沈玉貴請
以總兵記名簡放岳州府知府鍾英請以道員升用補
用參將李聚發請以副將儘先補用補用遊擊楊遠管
請以參將儘先補用補用都司李運隆請以遊擊儘先
補用湖南撫標左營候補都司姚紹期請以遊擊仍留
原省儘先補用儘先守備岳州城守營千總蔣聲耀請
以都司儘先補用並加遊擊銜儘先守備劉國梁請以
都司留湖廣督標儘先補用補用守備借補岳州營右
哨把總趙孟達請以都司儘先補用補用守備石雲峯
請以都司儘先補用補用千總借補岳州營外委蔣慶

留陝補用千總廖鎮江均請以守備仍留原標儘先補用分省補用知縣閔家鎮請以知州仍分省歸候補班前先補用湖北試用縣丞李兆庚劉肇墀均請以知縣仍留原省補用候選縣丞李宗藩請以知縣歸部不論雙單月儘先選用湖北儘先補用典史史悠森請仍以典史歸候補班前先補用湖北試用典史周樹棠請俟補缺後以縣丞補用團紳候選州同馮大成請以通判不論雙單月儘先選用長江水師岳州鎮總兵張捷書補用副將岳州鎮標中營遊擊周啟茂調補湖北撫標中營參將岳州城守營參將秦三元巴陵縣知縣陳濬

書均請交部從優議敘合無仰懇天恩俯准照擬給獎
出自逾格鴻慈謹合詞恭摺具奏伏祈聖鑒

硃批李謙等均著照所請獎勵餘依議該部知道欽此

臚陳黃彭年黃國瑾事實請宣付史館立傳摺

光緒

十八年八月
二十七日

竊照已故湖北藩司黃彭年前在任因病出缺當經臣
之洞臣繼洵會同奏報在案旋據湖北省在籍各紳前
漕運總督周恒祺前刑部員外郎劉希護等聯名具呈
以該故藩司遺愛在民呈懇奏請宣付史館列入循吏
傳並以該故藩司之子侍講銜翰林院編修黃國瑾學

有淵源天性純篤在京供職聞父喪遄征奔赴哀毀泣
血六日而卒至性過人呈懇奏請一併立傳又據湖北
補用知府傅圯孫調署漢陽縣蘄水縣知縣陳夔麟等
聯名具呈以該故藩司黃彭年孝行可風該員等均係
貴州同鄉見聞真切開具事實呈懇援照已故國子監
司業治麟成案奏請列入孝友傳各等情臣鴻章據直
隸省城蓮池書院肄業生徒翰林院編修胡景桂等畿
輔通志局員紳翰林院庶吉士孟慶榮等天津縣舉人
韓蔭楨等先後具呈以該故藩司黃彭年該故編修黃
國瑾父子主講保定暨天津書院成就人才甚衆呈懇

奏請宣付史館分別立傳等情當以該故藩司宦鄂最久該故編修因父喪毀卒在鄂省尤共見共聞咨會臣之洞臣繼洵由湖北主稿會奏正在飭行湖北藩司彙同查核事實詳請具奏間恭閱邸鈔該故藩司業經陝西撫臣鹿傳霖奏懇天恩宣付史館飭令各行江蘇湖北各省詳摭該故員生前政績爲之立傳等因奉旨允准在案臣等查該故藩司黃彭年歷官湖北陝西江蘇三省均有政績可紀其在湖北江蘇清操善政學道愛人遺愛流風尤爲最久且著其在直隸父子先後主講書院經師八師均爲無忝博考事實允愜公論敢就陝

西撫臣前奏所未及爲我皇上陳之查該故藩司黃彭年幼承其父前陝西鳳邠鹽法道黃輔辰家學砥礪名節博極羣書尤究心經世之學天性篤孝自入翰林授職未久卽請假歸里專意養親咸豐間屢奉詔特起皆以親老不克赴在籍隨其父辦理貴州團練以苗漢積不相能親入苗寨勸諭苗民翕然信從積憾盡釋地方賴以綏靖丁父母憂均結廬墓側同治初元前四川督臣駱秉章延之幕中贊畫戎機劇寇石達開盪平力辭保薦又與前陝西巡撫臣劉蓉友善以道學相切劘劉蓉延主講關中書院闡明關學士氣奮興嗣經臣鴻

章聘修畿輔通志采輯勤慎義例精詳主講蓮池書院
購書三萬三千餘卷儲之院中課士有程度人給以札
使爲日記月考其得失而高下之選刊蓮池肄業生日
記三十二卷院中經明行修之士接踵而起人文炳蔚
一時稱盛光緒八年蒙恩簡放湖北安襄鄖荆道署湖
北督糧道旋赴本任襄鄖界連陝豫會匪伏莽素多該
故員到任首以除暴安良爲務捕獲劇盜立寘之法其
被誘脅者悉予自新匪戢民安邊陲靜謐又購書數萬
卷儲之鹿門書院公餘之暇與諸生討論講習一如在
蓮池時旋升任湖北臬司獎廉懲貪抑強扶弱僚屬敬

畏通省肅然官場風氣爲之一變每與督撫司道集議公事該故員直言正論侃侃不撓適有裁兵節餉之議兵心搖惑官民咸有戒心該故員獨開誠告誠營伍咸奉約束矜慎庶獄平反巨案十餘起又以鄂省士人每喜健訟通飭各屬籍生員之干訟者牒以聞士風爲肅慮管押之濫則爲設待質所憫竊盜之多則爲建巡警局既於湖北臬司任內設學律館以教牧令復在江蘇藩司任內設學治館儲備有益治道諸書立課程定期會廣集僚屬講習研究手自批答孜孜無倦其護理江蘇巡撫也懲戒貪墨敦尙儉樸蘇省浮靡之習頗爲改

觀水旱連年籌賑銀至一百數十萬兩活民無算賑務告竣餘錢三十萬緡專奏請修吳淞江及白茆河蘊藻濱等處期免吳中水患復核減漕價分別蠲緩以紓民困在蘇州省城創設學古堂以課諸生成就人材極多洎調任湖北藩司覩鄂省物力之窘乏蓋藏之空虛時與臣之洞臣繼洵往復籌維憂形於色節虛靡杜請託甄拔沈滯勤求治理在任甫及兩月未竟厥施遽以積勞病故其易簀之前一日夜半猶手書致糧道商榷漕事身後蕭然無異寒素洵可謂本末不渝治行卓著者矣該故藩司之子已故翰林院編修黃國瑾幼秉祖

訓早讀父書刻苦自勵行誼純篤年十四遭祖母憂守禮盡哀如成人旋因其母病歿痛不欲生遂致鼻衄大作終身不瘥通籍後專以讀書考古講求經濟爲事植品端嚴不染世俗浮華奔競之習同館皆敬而服之嗣爲長蘆鹽運使如山延主問津三取書院時其父彭年方主講蓮池書院以樸學振興學者該故編修遂推行於天津仿廣東學海堂章程增設北學海堂經古課手訂規條示諸生以研經考古之法數年之間人才輩出嗣充國史館纂修本衙門撰文會典館總纂時會典館甫經開辦該故編修與在館諸人審定新章參酌成案

以會典分典例圖三門舊圖較略商於總裁奏請開辦
畫圖兼充繪圖總纂官條上界畫新圖測繪事宜通行
各省照辦館中事無巨細必躬必親綜理精詳黎明到
館日暮方歸雖嚴寒酷暑無少懈聞其父彭年在蘇藩
任內忽得中風疾倉皇馳往省視在途旬餘目不交睫
齒墮其五其父病愈促還京師供職會典館事務殷繁
值館中招考畫圖暨謄錄生每人須各授一題該故編
修詳爲擬題自圖象方輿以及禮制樂律諸大端分門
別類至百餘道之多殆聞父病歿馳赴湖北奔喪哀痛
迫切過天津時哀毀骨立臣鴻章實親見之抵鄂後懇

棺一慟絕而復蘇泣血六日遂以毀卒士林聞之無不痛惜茲據直隸湖北士紳追溯該故藩司黃彭年政聲教澤謳思不已復以其子已故編修黃國瑾孝行肫摯具呈請奏懇恩宣付史館分別列入循吏孝友等傳該故編修貴州同鄉現官湖北各員等復臚陳該故編修事實呈懇附奏立傳由湖北布政使王之春彙同具詳請奏前來臣等覆核參考洵屬政績學行卓然可傳輿論僉同合無仰懇天恩俯准將已故湖北布政使黃彭年政績事實宣付史館列入循吏傳已故翰林院編修黃國瑾學行事實列入國史館孝友傳以彰風化而順

輿情

硃批著照所請該衙門知道欽此

修理兵輪勻撥薪糧摺

光緒十八年八月二十七日

竊查上年秋間因長江一帶教案疊出會匪乘機煽惑生事湖北漢口及荊州宜昌等處需用兵輪彈壓當經臣商請總理各國事務衙門電致南洋大臣先後派撥測海飛霆兵輪二艘來鄂經臣分派漢口沙市兩處駐泊巡防彈壓旋准南洋大臣劉坤一咨南洋裁減兵輪備購新式碰快各船之用卽以測海兵輪撥歸湖北留用該船薪糧自光緒十八年正月分起卽由鄂省供支

南洋既省養船之費湖北亦免購船之資實爲一舉兩得等因奏奉硃批該衙門知道欽此恭錄咨行到鄂嗣以兵輪不敷巡防經臣復向南洋商借一輪旋准劉坤一咨又將金甌兵輪一併撥歸湖北駛用自本年四月起薪糧亦由鄂省支發各在案茲據湖北善後局鐵政局司道會詳稱查湖北爲南北水陸衝要漢口宜昌均係通商口岸華洋交錯民教雜居彈壓巡防必須兵輪方能得力外國向有兵輪停泊漢口近年往來尤多往往上至宜昌光緒初年鄂省曾購有漢廣兵輪一艘以備巡防平日交招商局承領駛用嗣因觸礁沈沒經前

督撫臣奏咨有案以後鄂省遂乏兵輪現經南洋以測海金甌兵輪二艘撥歸湖北駛用具見南洋大臣劉坤一不分畛域力顧大局惟查省城以下由漢口以迄武穴省城以上過荊州而達宜昌口岸衝繁匪徒混迹加以湖南岳州與荊境毗連近年屢滋事端亦須時往巡察鎮撫統計上下游一千數百里間必須兵輪三艘方能兼顧茲查有光緒十五年由粵調鄂之楚材兵輪一艘前經奏明撥歸鐵政局駛用船身堅壯礮位齊全第鍋鑪機器節年未加修換用煤過費前據上海耶松洋廠勘估修費需銀五萬餘兩所需過鉅未及修改現值

漢陽煉鐵廠內機器一廠先成輪船鍋爐均能自行修
改飭據委員勘估照換鍋爐一切機器添新改舊限五
箇月全船修竣必能節省煤斤行駛較前加速撙節至
再需銀二萬一千餘兩較之洋廠修費已減少二萬八
千餘兩復經飭善後局逐款覆核委係無可再減目前
需用甚亟當飭該局照估修理工竣造冊報部彙銷現
在鐵政局拖鑛輪船二艘已經造就擬卽勻出楚材一
輪撥歸善後局駛用俾巡防較爲周妥儻鐵政局有鑛
務等差撥用煤油等項應隨時由鐵政局另給以清界
限查楚材兵輪前在粵月支薪糧銀一千二百三十餘

兩及調歸鄂省已奏明核減有案月支銀八百三十餘兩無可再減測海薪糧江南籌防局原定數目銀洋合計每月支銀一千一百一十餘兩金甌薪糧江南原定月支銀五百三十七兩有奇該兩船均係兵輪需用礮手水勇打磨操演非尋常官差輪船可比薪糧亦皆核實不能再減鄂省餉力極絀善後局籌撥兵輪三艘經費常年供支實力有未逮復飭該司道等再四籌商惟有通融辦理以兩輪之費勻作三輪之用卽就測海金甌兩輪薪糧核計每月共支銀一千六百四十餘兩儘此銀數勻作三船經費楚材不另開支平日駐防巡緝

兵輪三艘不能同時並開即將礮手水勇人等自行通
挪勻撥應用如三輪有必須並開之時臨時照原定人
數薪糧一律募足事竣即行停止仍照兩輪開支大率
一年之中以九箇月開支兩輪薪糧勻撥應用以三箇
月開支三輪薪糧隨時核實造報行住合併牽算總以
三箇月爲度如此變通辦理餉力尙可支持此實因鄂
省庫儲匱乏籌撥不易而沿江上下游彈壓巡防兩輪
又不敷用是以爲此權宜騰挪之計旣免購船之資又
以兩輪經費而得三輪之用於巡緝地方彈壓口岸均
有裨益等情詳請奏咨立案前來臣覆加查核巡江兵

輪爲鄂省目前時勢萬不可少之需該司道等所陳均
係實在情形籌計節省亦甚周妥謹會同湖北巡撫臣
譚繼洵恭摺具奏伏祈聖鑒

硃批該衙門議奏欽此

酌議嚴懲會匪章程摺

光緒十八年九月十四日

竊臣等承准軍機大臣字寄光緒十七年六月初六日
奉上諭各省哥老會匪最爲地方之害迭經降旨查拏
並經各該督撫先後獲案奏明懲辦惟此等匪徒行蹤
詭祕往往與游勇地痞暗相勾結動輒糾集黨與乘機
煽亂甚至造謠惑衆潛謀不軌近來江蘇安徽湖北江

西等省屢有焚毀教堂之事其拒捕逞兇搶劫衙署等案更層見迭出半由會匪從中主謀游手之徒相率附和以致愈聚愈多動成巨案犯事以後四散逃逸真犯十不獲一若不先事籌辦絕其根株則涓涓不息將成江河後患何堪設想著各直省將軍督撫嚴飭地方文武隨時留心實力查緝如有訪獲會匪首犯一面嚴行懲辦一面准將出力員弁照異常勞績隨案奏請優獎但須查有確實證據不得因希圖保獎妄拏無辜致滋擾累凡地方良民有誤買匪徒保家偽票呈繳地方官者免其治罪其有向充會匪自行投首密報匪首姓名

因而拏獲者亦一律宥其既往准予自新該將軍督撫
務卽出示曉諭俾衆咸知總期嚴懲首要解散脅從以
除奸宄而安良善慎毋養癰成患貽害地方是爲至要
將此通諭知之欽此當卽恭錄咨行欽遵辦理在案臣
等自上年春夏以來因湖南及沿江會匪屢次蠢動滋
事迭經嚴飭地方文武水陸防營懸立重賞購緝密緝
奉旨後通飭各屬剴切示諭嚴密查拏先後拏獲長江
會匪首要高德華葉坤山等及襄河會匪李朝奎等當
將拏獲訊明懲辦各情形恭摺具奏並札飭前署按察
使惲祖翼詳繹例意參考近年成案妥議懲辦章程通

飭州縣遵辦去後嗣據該署司詳稱鄂省爲南北衝要
游匪素多往來無定最易潛匿會匪幾至無地無之始
則長江上下游一帶近則襄河上下游一帶隨處皆有
根株盤結消息靈通該匪等開立山堂散放飄布分授
僞職僞號往往與教匪游勇地痞暗相勾結乘機煽亂
各屬所獲會匪各案起到飄布印章板片及所訊名目
口號詞意悖逆顯然謀爲不軌上年沿江一帶會匪蓄
謀滋事動成巨案若非先事捕其渠魁散其夥黨誠如
聖諭所云養癰貽患必致有關大局亟應明定章程從
嚴懲辦以遏亂萌擬請嗣後責成州縣隨時訪查如有

會匪溷跡境內立即會督營汛嚴密拏獲悉心研審如
係會匪爲首開堂放飄者及領受飄布輾轉糾夥散放
多人者或在會中名目較大充當元帥軍師坐堂陪堂
刑堂禮堂等名目者與入會之後雖未放飄輾轉糾人
而有夥同搶刦情事者及勾結教匪煽惑擾害者一經
審實卽開錄詳細供摺照章稟請覆訊就地正法此外
如有雖經入會並非頭目情罪稍輕之犯或酌定年限
監禁或在籍鎖帶鐵桿石墩數年俟限滿後查看是否
安靜守法能否改過自新分別辦理其無知鄉民被誘
被脅誤受匪徒飄布希冀保全身家並非甘心從逆之

人如能悔罪自首呈繳飄布者一概寬免究治其有向充會匪自行投首密報匪首姓名因而拏獲亦一律宥其既往准予自新若投首後又能作綫引拏首要各犯到案究辦除免罪之外仍由該地方官酌量給賞總期嚴懲首要解散脅從以除奸宄而安善良地方文武員弁能拏獲會匪著名首要審實懲辦卽將尤爲出力員弁核其情節照異常勞績隨案請給優獎如有希圖保獎妄拏無辜或姑息徇縱不拏不辦以及曲爲開脫一經查出卽行嚴參如此明定章程各州縣有所遵循自必隨時留心實力查緝不敢輕縱玩忽該匪黨亦各知

所做懼地方可期安謐等情詳經核定並由按察使陳
寶箴詳請具奏前來臣等伏查近年會匪日熾沿江沿
海爲尤甚滋蔓愈廣蓄謀愈險若不及早懲遏將來終
恐爲大局之憂查光緒八年刑部奏定通行章程各省
會匪本有就地正法之條無如州縣狃於積習毫無遠
慮往往牽引異姓結拜弟兄舊例曲爲開脫以致伏莽
日滋寢成巨患湖北所議章程自應奏明通行各屬俾
有遵守該司所擬首悔免罪及分別輕重辦法於懲奸
弭亂之中仍不失宥過持平之意消除巨患卽所以保
全善良文武員弁如能拏獲著名首要自應酌核案情

欽遵諭旨隨案奏請優獎如妄拏無辜擾累閭閻以及縱匪貽害亦卽嚴行參處仰副朝廷除莠安良綏靖地方之至意

硃批刑部議奏欽此

拏獲襄陽匪徒訊明懲辦摺

光緒十八年九月十四日

竊查襄陽府屬之襄陽穀城光化等縣本年六月閏六月間該處瘟疫盛行死亡相繼每一村之中一日疫斃至百餘人之多民間朝不保暮謠言紛起謂係有人置毒井中無知愚民展轉傳播始於穀城光化及於襄陽以下之宜城民間多方戒備遇有外來語音不同形迹

較生之人或赴井飲水或身帶暑藥輒指爲下毒之人
衆怒洶湧混行攢毆幾至斃命執送到官查驗皆無憑
據城鄉多張匿名揭帖造作怪妄不經之語民心惶恐
襄河兩岸上下數百里間紛紛遷徙避亂不知所由或
移家入城或聚團上砦遂有匪徒各處乘機放火搶刦
情事民間甚爲驚擾刀會各匪大有蠢動之勢毗連襄
郡之隨州亦於閏六月間有會匪在小林店高城總等
處數十里間徧插紅布小旗造謠煽亂之事臣等接據
該道府縣及提督臣程文炳來電以襄陽緝私馬隊及
提標練軍因緝私各路分紮兵力較單當卽飭派鐵字

營勇一營星夜馳往駐劄樊城彈壓以杜匪謀因光化之老河口水陸衝繁游匪素衆穀城地方教堂教民最多電飭安襄鄖荆道朱其煊會同提標中軍參將蒯德浦分帶馬隊練軍馳赴光穀一帶巡邊緝匪妥爲彈壓勿令稍滋事端並委湖北候補道陳汝蕃前往會同查辦旋據襄陽縣知縣梅冠林稟稱本年入夏以後該處疫症盛行民間造謠揭帖至閏六月二十五日夜距城四十五里之楊家岡地方有匪徒燒燬教民學堂內初造未成廚房一間並教民楊姓朱姓空屋草房各數間又二十七日夜距楊家岡八里之魏家冲地方復有匪

徒放火燒燬該村民人魏全長門前草堆經兵役查見
當場擊獲匪犯陳志道一名在該犯身上搜獲劍一口
又經兵役續獲朱苟王老三陳老大三名又訪獲楊家
岡縱火匪犯劉四五李發子胡七星三名訊據朱苟供
認起意放火故燒草堆冀圖乘亂搶奪財物陳志道陳
老大王老三聽從燒搶又訊據劉四五供認因謠傳煽
惑人心驚慌聽從在逃之陳三元燒屋行搶李發子與
劉四五並非同夥因見附近楊家岡火起糾約在逃之
李四九陳貴有前往燒燬草房搶掠財物胡七星係李
發子誘脅同行並未放火得財各等供並據襄陽道府

等查明稟覆前來臣等查該犯朱苟於地方人心惶惑之際放火行搶蓄謀擾亂陳志道聽從燒搶在火所當場拏獲劉四五聽從在逃之陳三元乘機焚劫李發子糾衆燒搶得贓均屬不法亂民應按照土匪章程懲辦當經批飭將朱苟陳志道劉四五李發子四犯先行正法傳首滋事地方梟示以靖人心其已獲之陳老大王老三未獲之陳三元等各犯飭縣分別審擬嚴緝此懲辦襄陽放火匪徒之情形也又穀城縣境內疫證傳染死亡尤多民間亦因井中下毒之謠羣懷疑懼一時訛言四起水陸過往商民動遭毆擊甚至揚言將拋入河

內閏六月十九日遂有匪徒在千莖樹地方焚燒教民
雷財義房屋並焚斃其母雷謝氏之事距該處百餘里
有地名沈家埡地處衆山之中有大教堂一所起自乾
隆年間環教堂而居者數百家皆係教民因千莖樹被
焚後人心搖惑民教互相猜防民人齊團相持教民亦
紛紛遷徙幾釀巨衅當經提督臣程文炳分派弁兵於
赴沈家埡之要隘石花街駐防彈壓並經該道朱其煊
參將蒯德浦等帶隊前往查拏傳集紳首詳加開導民
團旋經解散教堂亦平靜無事現在謠風已息至教民
房屋被燒一節前據雷財義赴縣呈報卽經前署穀城

縣汪齊輝勘明所燒瓦房三間係雷姓所修預備該教中人往來歇宿之所草房二間係教民雷財義住屋並驗明雷謝氏被燒屍身等情填格詳報又經疊飭嚴拏正犯去後現據接署縣鍾桐山稟報前經紳首供指葉興茂等數人又拏獲之周稱一名供情尙未確實其放火正犯姓名已經訪有端倪現已飭催緝獲到案嚴行審辦此穀城地方解散驚擾民團暨防護教堂之情形也又光化之老河口爲豫陝水陸通衢商市稠密與穀城連界亦因謠疫流傳民情惶擾屢有匪徒張貼匿名揭帖臚列紳民多人姓名訂期閏六月二十二七月二

十八等日焚毀教堂意在挑激民教構衅乘機作亂經該縣梁沛英統帶襄河水師提督劉鶴齡及委員等曉諭查禁彈壓幸未激成事端當經飭令各員弁隨時防範嚴拏造謠揭帖之人現已查獲造謠之陳述琳一名俟訊明確供卽行懲辦此光化境內查獲造謠惑衆匪徒之情形也自八月以來襄陽各屬疫謠已息民教皆安道員陳汝蕃回省面稟情形與各該地方官所稟相符臣等查此次襄郡因時疫流行匪徒造謠惑衆縱火焚燒意在乘機爲亂至襄陽穀城兩縣被燒者民教房屋皆有同時各村無故火起旋經撲滅者甚多其被毆

者大率皆係外來客民乃教士輒以教民被民人殺害多名赴縣具稟又不能指出凶手主名除雷姓被燒先經該縣驗報外至今並無屍親一人報官請驗總之此乃匪徒煽亂圖劫並非專與教民爲難更與洋人教堂無涉惟有查核案情實據按照向來懲辦土匪盜匪例章辦理惟近年濱江各省會匪甚衆教案亦多皆有關地方利害襄陽界連陝豫又爲鄖陽咽喉楚之北門最關重要且素爲刀會各匪出沒之所此次匪徒造謠煽亂狡謀叵測各縣騷動若不嚴加防緝襄鄖一帶必致土匪蠭起重煩兵力現仍督飭地方文武暨水陸各營

務將此次放火案內逸犯暨向來有名各匪查拏嚴懲
以弭亂源

硃批該衙門知道欽此

張文襄公全集卷三十一終

吉林慶

珍校